

南無本師釋迦牟尼佛



妙法蓮華經卷第三

藥草喻品第五

爾時世尊。告摩訶迦葉。及諸大弟子。善哉善哉。迦葉善說如來真實功德。誠如所言。如來復有無量無邊阿僧祇倍方便功德。汝等若於無量億劫說不能盡。迦葉當知。如來是諸法之王。若有所說。皆不虛也。於一切法。以智方便而演說之。其所說法。皆為到於一切智地。如來觀知一切諸法之所歸趣。亦知一切衆生深心所行。通達無礙。又於諸法究盡明了。然後示諸衆生一切智慧。迦葉。譬如三千大千世界山川谿谷土地。所生卉木叢林。及諸藥草。種類若干。名色各異。密雲彌布。徧覆三千大千世界。一時等澍。其澤普洽卉木叢林。及諸藥草。小根小莖。小枝小葉。中根中莖。中枝中葉。大根大莖。大枝大葉。諸樹大小。隨上中下各有所受。一雲所雨。稱其種性而得生長。華果敷實。雖一地所生。一雨所潤。而諸草木。各有差別。迦葉當知。如來亦復如是。出現於世。如大雲起。以大音聲。普告世界。天人阿修羅於大衆中而唱是言。我是如來。應供。正徧知。明行足。善逝。世間解。無上士。調御丈夫天人師。佛。世尊。未度者令度。未解者

令解。未安者令安。未涅槃者令得涅槃。今世後世如實知之。我是一切知者。一切見者。知道者。開道者。說道者。汝等天人阿修羅衆。皆應到此。為聽法故。爾時無數千萬億種衆生。來至佛所而為聽法。如來於時。觀是衆生諸根利鈍。精進懈怠。隨其所堪一時異音而為分別說法。種種無量。皆令歡喜。快得善利。是諸衆生各各聞是法已。現世安隱。後生善處以法受樂。亦得增益聞法。既聞法已。離諸障礙。於諸法中任力所能。漸漸得入真實佛道。如彼大雲。雨於一切卉木叢林及諸藥草。如其種性。具足蒙潤。各得生長。如來說法。一相一味。所謂解說相。離相。滅相。究竟為至於一切種智。其有衆生聞如來法。如說修行。所得功德不自覺知。所以者何。唯有如來。知此衆生過去現在種相體性。念何事。思何事。修何事。云何念。云何思。云何修。以何法念。以何法思。以何法修。以何法得何法。衆生住於種種境地。唯有如來如實見之。明了無礙。如彼卉木叢林諸藥草等。而不自知上中下性。如來知己。然後以一相一味之法度之。所謂解脫相。離相。滅相。究竟涅槃常寂滅相。終歸於空。佛知是已。觀衆生心欲而將護之。是故不即為說一佛乘一切種智。

汝等迦葉。甚為希有。能解如來隨宜說法。皆為阿耨多羅三藐三菩提。能信能受。所以者何。諸佛世尊隨宜說法。意趣難解難知故。

我為法王	出現世間	隨衆生欲	種種說法
如來尊重	智慧深遠	久默斯要	不務速說
有智若聞	則能信解	無智疑悔	則為永失
是故迦葉	隨力為說	以種種緣	令得正見
迦葉當知	譬如大雲	起於大千	徧覆一切
密雲含潤	電光晃曜	雷聲遠震	令衆悅豫
日光揜蔽	地上清涼	靉靄垂布	如可承攬
其雨普等	四方俱下	流澍無量	率土充洽
山川險谷	幽邃所生	卉木藥草	大小諸樹
百穀苗稼	甘蔗蒲萄	雨之所潤	無不豐足
乾地普洽	藥木並茂	其雲所出	一味之水
草木叢林	隨分受潤	一切諸樹	上中下等
稱其大小	各得生長	根莖枝葉	華果光色
一雨所及	皆得鮮澤	如其體相	性分大小
能潤是一	而各滋茂	佛亦如是	出現於世

譬如大雲	普覆一切	既出於世	為諸衆生
分別演說	諸法之利	大聖世尊	於諸天人
一切衆中	而宣是言	我為如來	兩足之尊
出於世間	猶如大雲	充潤一切	枯槁衆生
皆令離苦	得安隱樂	世間之樂	及涅槃樂
諸天人衆	一心善聽	皆應到此	覲無上尊
我為世尊	無能及者	安隱衆生	故現於世
為大衆說	甘露淨法	其法一味	解脫涅槃
以衆妙音	演暢諸義	常為一乘	作助因緣
我觀一切	普皆平等	無有彼此	愛憎之心
我無貪著	亦無限礙	恆為一切	平等說法
如為衆多	一人亦然	常演說法	曾無他事
去來坐立	終不疲厭	貴賤上下	持戒毀戒
威儀具足	及不具足	正見邪見	利根鈍根
等雨法雨	而無懈倦	一切衆生	聞我法者
從法化生	住於諸地	或處人天	轉輪聖王
釋梵諸王	是小藥草	知無漏法	能得涅槃
起六神通	及得三明	獨處山林	常行禪定

得緣覺證	是中藥草	求世尊處	我當作佛
行精進定	是上藥草	又諸佛子	專心佛道
常行慈悲	自知作佛	決定無疑	是名小樹
安住神通	轉不退輪	度無量億	百千衆生
如是菩薩	名為大樹	佛平等說	如一味雨
隨衆生性	所受不同	如彼草木	所稟各異
我以此喻	方便開示	種種言辭	演說諸法
於佛智慧	如海一滴	我雨法雨	充滿世間
一味之法	隨力修行	如彼叢林	藥草諸樹
隨其大小	漸增茂好	諸佛之法	常以一味
令諸世間	普得具足	漸次修行	皆得佛果
聲聞緣覺	處於山林	住最後身	聞法得果
是名藥草	各得增長	若諸菩薩	智慧堅固
了達三界	求最上乘	是名小樹	而得增長
復有住禪	得神通力	聞諸法空	心大歡喜
放無數光	度諸衆生	是名大樹	而得增長
如是迦葉	佛出世間	譬如大雲	以一味雨
潤於人華	各得成實	迦葉當知	如來方便

以諸因緣	種種譬喻	皆為最後	開示佛道
是我方便	諸佛亦然	今為汝等	說最實事
諸聲聞衆	皆非滅度	汝等昔行	是菩薩道
漸漸修學	悉當成佛		